



Skýrsla

þingflokks Pírata

148. löggjafarþing 2017-2018

Júlí 2018

Inngangur

148. löggjafarþing var sett þann 14. desember 2017. Þingsetning fór fram seint á árinu í kjölfar kosninga sem komið höfðu til vegna falls ríkisstjórnar. Þingið var að störfum frá 14. desember til 29. desember þar sem fjárlög voru afgreidd og samþykkt sem lög frá Alþingi. Var þá gert hlé á þingfundum þar til 22. janúar 2018 þegar vorþing hófst og stóð það til 13. júní. Þannig var þing samtals að störfum í 157 daga, en á þessum tíma voru haldnir 79 þingfundir sem stóðu í rúmar 408 klst.

Við upphaf 148. löggjafarþings tók nýr þingflokkur Pírata til starfa, rétt eins og árið áður, en kosningar höfðu þá farið fram tvö ár í röð með litlum fyrirvara. Fjöldi þingsæta Pírata hafði minnkað, en nú telur þingflokkur Pírata sex þingmenn, þar sem hann var áður 10 þingmenn, en þar á undan þrír. Þingflokkur Pírata hefur þannig á þessu stutta tímabili tekið talsverðum breytingum en á sama tíma aflað sér nauðsynlegrar þekkingar og reynslu og unnið að því að búa til það starfsumhverfi sem stuðlar að árangri. Við upphaf 146. löggjafarþings, þegar kosningar voru yfirstaðnar og 10 manna þingflokkur tók til starfa höfðu einungis þrír þingmenn reynslu af því að sitja á Alþingi sem aðalmenn, en tveir sem varamenn. Við upphaf 148. löggjafarþings voru hins vegar engir þingmenn sem tóku sæti í fyrsta skipti. Af þeim voru tveir þingmenn höfðu þingreynslu allt frá 143. löggjafarþingi árið 2013, en allir höfðu setið um nokkurt skeið sem aðalmenn. Þá tóku til viðbótar fjórir varamenn sæti á Alþingi, þar af þrír sem höfðu ekki gert það áður.

Í þessari skýrslu verður farið yfir þingveturinn, hvaða árangri hefur verið náð í hinum ýmsu málum en einnig hvernig staðið hefur verið að uppbyggingu innra skipulags þingflokksins, sem og tengsla hans út á við, bæði gagnvart grasrót og almenningi. Þá verður einnig vikið að aðkomu þingflokksins að stjórnarmyndunarviðræðum í kjölfar síðustu kosninga. Yfirlitsrit á borð við það sem hér er ritað getur aldrei orðið tæmandi en ætti engu að síður að gefa góða mynd af störfum kjörinna fulltrúa Pírata á þingi frá síðasta desember og þar til nú.

Þingflokkur Pírata starfar eftir [grunnstefnu](#) Pírata, í samræmi við [kosningaáherslur](#) sem kynntar voru fyrir síðustu Alþingiskosningar og samkvæmt öðrum [samþykktum stefnum](#) Pírata.

Þess skal getið að fundargerðir þingflokks Pírata eru [aðgengilegar á vefsíðu Pírata](#).

Efnisyfirlit

Inngangur	1
Efnisyfirlit	2
Samsetning og skipulag þingflokks Pírata	3
Stjórnarmyndunarviðræður	4
Þinglok	4
Stóru málefni á 148. löggjafarþingi	6
Fjárlög	6
Fjármálastefna og fjármálaáætlun	6
Þjónusta við fatlað fólk með langvarandi stuðningsþarfir og félagsþjónusta sveitarfélaga	6
Skipan dómara í Landsrétt og vantrauststillaga á dómsmálaráðherra	7
Barnaverndarmál (og framboð Braga Guðbrandssonar til barnaréttarnefndar SP)	8
Almenna persónuverndarreglugerðin (GDPR)	10
Kjararáð	11
Rafrettur	12
Frammistöðubættandi efni (sterafrumvarpið)	13
Störf fastanefnda Alþingis	13
Allsherjar- og menntamálanefnd	13
Atvinnuveganefnd	15
Efnahags- og viðskiptanefnd	15
Fjárlaganefnd	16
Stjórnskipunar- og eftirlitsnefnd	17
Umhverfis- og samgöngunefnd	17
Utanríkismálanefnd	18
Velferðarnefnd	18
Tölfræðileg samantekt á þingstarfinu	20
Tölfræði um þingmenn Pírata	20
Fjöldi lagafrumvarpa, þingsályktunartillagna og skriflegra fyrirspurna á 148. þingi frá þingmönnum öðrum en ráðherrum	21
Fyrirspurnir til ríkisstjórnarinnar á 148. þingi	22
Þingmál Pírata	23
Frumvörp	23
Þingsályktunartillögur	24
Skýrslubeiðnir	24
Fyrirspurnir	24

Samsetning og skipulag þingflokks Pírata

Þingflokkur Pírata telur:

- Björn Leví Gunnarsson
- Halldóra Mogensen (formaður velferðarnefndar)
- Helgi Hrafn Gunnarsson (varaformaður þingflokks)
- Jón Þór Ólafsson (ritari þingflokks og 5. varaforseti Alþingis)
- Smári McCarthy
- Þórhildur Sunna Ævarsdóttir (formaður þingflokks)

Að auki tóku eftirtaldir varapíngmenn sæti á þinginu:

- Álfheiður Eymarsdóttir
- Olga Margrét Cilia
- Sara Elísa Þórðardóttir
- Snæbjörn Brynjarsson

Starfsmenn þingflokks Pírata:

- Eiríkur Rafn Rafnsson
- Baldur Karl Magnússon

Þingmenn Pírata eru sex talsins og telur þingflokkurinn fjóra karla og tvær konur. Alls hafa 10 einstaklingar tekið sæti á Alþingi fyrir hönd Pírata á 148. löggjafarþingi, þar af 5 konur og 5 karlar. Af sex þingmönnum þingflokks Pírata höfðu allir áður sítíð á Alþingi sem varamenn. Af þeim varamönnum sem tóku sæti hafði aðeins einn tekið sæti áður. Því tóku þrír Píratar sæti í fyrsta skipti á Alþingi.

Við upphaf 148. löggjafarþings, nánar tiltekið á þingflokksfundi þann 20. nóvember 2017, fór fram val í stjórn þingflokksins. Stjórn þingflokksins skipa formaður, varaformaður og ritari. Aðeins eitt framboð barst í hvert embætti og var því lögð fram tillaga til samþykktar um að Þórhildur Sunna Ævarsdóttir yrði formaður þingflokks, Helgi Hrafn Gunnarsson yrði varaformaður þingflokks og að Jón Þór Ólafsson yrði ritari þingflokks. Var tillagan samþykkt með öllum greiddum atkvæðum.

Píratar hafa ekki formann, en samkvæmt reglum forsætisnefndar Alþingis er formönnum flokka sem ekki eiga sæti í ríkisstjórn tryggður aðstoðarmaður. Til þess að tryggja að ekki skapist aðstöðumunur þar sem hallar á þingflokk Pírata miðað við aðra flokka á þingi er formaður valinn með hlutkesti, og þannig tryggt að þingflokkurinn fái aðstoðarmann, sem starfar þá fyrir alla þingmenn flokksins en ekki bara formann eins og tíðkast hjá öðrum þingflokkum. Á þessu löggjafarþingi var Halldóra Mogensen valinn formaður flokksins með hlutkesti (sex hliða tening).

Stjórnarmyndunarviðræður

Boðað var til Alþingiskosninga haustið 2017 eftir að ríkisstjórn Sjálfstæðisflokks, Viðreisnar og Bjartrar framtíðar féll þann 15. september í kjölfar hneykslismála vegna uppreistar æru kynferðisafbrotamanna. Úrslit kosninganna voru á þann veg að þáverandi stjórnarandstaða hafði möguleika á að mynda ríkisstjórn með meiri hluta þingsæta, en það voru flokkar Vinstri grænna, Samfylkingar, Framsóknarflokksins og Pírata. Þó að Sjálfstæðisflokkurinn hefði hlotið flest atkvæði og flest þingsæti varð þessi staðreynd, og orðafar annarra flokka stjórnarandstöðunnar um að hún teldi rétt að formaður Vinstri grænna hlyti umboð til stjórnarmyndunar, til þess að Katrín Jakobsdóttir fékk umboð Forseta Íslands til að mynda ríkisstjórn.

Óformlegar viðræður á milli flokka höfðu þegar staðið í nokkurn tíma, en formlegar viðræður hófust þann 2. nóvember 2017. Fulltrúar Pírata í viðræðunum voru umboðsmenn Pírata, þau Þórhildur Sunna Ævarsdóttir, Helgi Hrafn Gunnarsson og Smári McCarthy. Á meðan viðræðunum stóð funduðu umboðsmenn flokkanna oft. Á fundunum var unnið að samkomulagi um málefni, og hvernig skipan mögulegrar ríkisstjórnar gæti verið. Píratar tóku þátt í viðræðunum með heiðarlegan vilja til að ná samkomulagi sem gæti leitt til þess að við tæki ríkisstjórn sem berðist fyrir raunverulegum umbótum með almannahagsmuni að leiðarljósi í stað sérhagsmuna og spillingar. Viðræðunum miðaði vel framan af og var útlit fyrir að hægt væri að ná samkomulagi um öll helstu mál sem Píratar lögðu áherslu á. Þar má sérstaklega nefna endurskoðun stjórnarskrár byggða á frumvarpi Stjórnlagaráðs, endurreisn heilbrigðiskerfisins, aðgerðir til að binda endi á krísu á húsnæðismarkaði, bætt kjör lágtekjuhópa, og svo mætti lengi telja.

Viðræðum Vinstri grænna, Samfylkingar, Framsóknarflokks og Pírata var slitið að kvöldi 6. nóvember. Eftir að formlegum viðræðum var slitið sendi þingflokkur Pírata frá sér [tilkynningu](#) þar sem hann lýsti því að hann væri tilbúinn að leita að breiðari samstöðu og halda samtalinu áfram.

Þann 14. nóvember hófust formlegar stjórnarmyndunarviðræður Sjálfstæðisflokks, Framsóknarflokks og Vinstri grænna. Þar sem Sjálfstæðisflokkur hafði ekki möguleika á að ná meiri hluta þingsæta með sínum hefðbundnu samstarfsflokkum var nauðsynlegt að bæta við nýjum samstarfsflokkum. Þannig tóku Vinstri græn í fyrsta skipti þátt í myndun ríkisstjórnar með Sjálfstæðisflokknum og gerðu honum mögulegt að halda völdum, þrátt fyrir að þau mál sem felldu síðustu ríkisstjórn væru enn óuppgerð, að þeir ráðherrar sem bæru ábyrgð á þeim sætu áfram og að stjórnarandstaða síðasta kjörtímabils hefði náð hreinum meiri hluta þingsæta.

Þinglok

Þegar síðasti skipulagði þingfundur nálgast á voru hverju fara alla jafna af stað viðræður sem snúa að því að ljúka þingstörfunum áður en að þingið fer í frí fyrir sumarið. Í viðræðunum er alla jafna leitað að samkomulagi fyrir því að tiltekin stjórnarmál verði samþykkt og að tiltekin þingmannamál stjórnarandstöðunnar verði samþykkt einnig. Það

verður að nefna að mikið af þeim stjórnarmálum sem lágu fyrir til afgreiðslu við þinglok komu seint fram á þingvetrinum og voru mörg þeirra haldin fjölmörgum göllum auk þess sem mörg þeirra gætu haft víðtækar neikvæðar afleiðingar. Sem dæmi má nefna [frumvarp dómsmálaráðherra um breytingu á lögum um útlendinga og lögum um Schengen-upplýsingakerfið á Íslandi](#). Lögin fólu í sér ýmsar breytingar sem voru til þess fallnar að takmarka verulega málsmeðfarréttindi umsækjenda um alþjóðlega vernd. Þingflokkur Pírata lagði áherslu á í viðræðunum að málið fengi ekki afgreiðslu í núverandi mynd og endaði það með því að frumvarpið var ekki afgreitt. Þannig hefur þingflokkur Pírata í þessum viðræðum alla jafna lagt mikla áherslu á að koma í veg fyrir að stjórnarmál sem geti haft víðtækar neikvæðar afleiðingar verði að lögum. Það mál sem vóg hvað þyngst í þeim viðræðum sem fram fóru við lok 148. löggjafarþings var frumvarp dómsmálaráðherra um persónuvernd, sem fól í sér innleiðingu á almennu persónuverndarreglugerðinni (GDPR). Nánar er fjallað um það mál í sér kafla hér að neðan. Þá var mikið til umræðu fyrirhuguð lækkun á veiðigjöldum, en frumvarp um lækkunina var lagt fram af þingmanni Vinstri grænna og formanni atvinnuveganefndar, Lilju Rafneyju Magnúsdóttur. Endalok málsins urðu þau að lagt var fram nýtt frumvarp sem fól ekki í sér lækkun veiðigjalda heldur voru núverandi veiðigjöld framlengd.

Viðræðunum lauk með þeim hætti að öll þau mál sem voru of gölluð til þess að afgreiða voru stöðvuð, eða að nauðsynlegar breytingar voru gerðar á málunum áður en að þau voru samþykkt. Þá var þingmáli Pírata um skilyrðislausa grunnframfærslu vísað til framtíðarnefndar, en þess má geta að [Smári McCarthy verður formaður nefndarinnar](#).

Þingfundum 148. löggjafarþings var frestað skömmu eftir miðnætti þann 13. júní 2018. Þingið mun koma aftur saman um miðjan júlí og halda tvo þingfundi, þann síðari 17. júlí á Þingvöllum í tilefni af 100 ára afmæli fullveldis á Íslandi.

Stóru málefnið á 148. löggjafarþingi

Nokkur mál stóðu upp úr á þinginu og verða þau rakin hér í stuttu máli.

Fjárlög

Fyrir kosningar höfðu Píratar lagt fram opinberlega svokölluð skuggafjárlög Pírata, en þar gafst kjósendum tækifæri á að kynna sér til þaula hverjar helstu áherslur Pírata yrðu í ríkisfjármálum ef þeir ættu aðild að ríkisstjórn. 11 milljarðar voru eyrnamerkir uppbyggingu á húsnæði til að tryggja sem flestum öruggt húsaskjól og stórauka átti fjármagn til heilbrigðismála, sérstaklega geðheilbrigðismála. Í umræðum um fjárlög ríkisstjórnarinnar gerði þingflokkur Pírata sitt ýtrasta til að sjá þessa framtíðarsýn verða að veruleika og tryggja innviði opinberrar þjónustu.

Ljóst var strax við upphaf þingfunda að fjárlög yrðu samin í nokkrum flýti þar sem ný ríkisstjórn hafði aðeins nokkra daga til að setja mark sitt á þau. Aukning á fjármagni til háskólanna reyndist jákvæð breyting, en algjört andvaraleysi við rekstrarvanda Landspítalans og algjör skortur á aðgerðum í húsnæðismálum voru í hrópandi ósamræmi við yfirlýsingar ríkisstjórnarinnar, og það þrátt fyrir að blekið væri varla þornað á loforðum hennar. Í ofanálag var málið keyrt í gegn um Alþingi með gríðarlegum hraða og álagi.

Björn Leví Gunnarsson lagði fram [nefndarálit](#) og [breytingartillögu](#) að fjárlögum. Helstu breytingar sneru að rekstri Landspítalans, fjármagni til að lækka krónu á móti krónu skerðingar og 12 milljarða króna framlag til nýbygginga á íbúðarhúsnæði. Stjórnarflokkarnir felldu breytingatillöguna, sem og þær breytingatillögur sem Píratar lögðu fram fyrir þriðju umræðu málsins.

Fjármálastefna og fjármálaáætlun

Nefndarálit Pírata um [fjármálastefnu](#) og [fjármálaáætlun](#) voru bæði með frávísunartillögu. Bæði stefnan og áætlunin voru ókláruð. Hvorugt málið uppfyllir skilyrði laga um opinber fjármál og frávísun þeirra til ríkisstjórnarinnar var krafa um að fá betra verk. Fjármálastefnan var ekki grunngjaldamiðuð og stefna stjórnvalda, eins og hún átti að birtast í áætluninni, var án mælanlegra markmiða og greiningar um áhrif stefnunnar á þróun tekna og gjalda ríkissjóðs. Hvorugt málið fékk mikla umfjöllun í þingsal, sem er mjög merkilegt. Maður hefði haldið að ríkisstjórnin hefði viljað tala sem mest um fyrstu ríkisfjármálaáætlunina sína en miðað við alla gallana sem í henni voru þá var það líklega dálítið óþægilegt að þurfa að hlusta á stjórnarandstöðuna benda á þá alla.

Þjónusta við fatlað fólk með langvarandi stuðningsþarfir og félagsþjónusta sveitarfélaga

Snemma á þinginu voru lögð fram að nýju tvö mikilvæg frumvörp sem höfðu þá verið lögð fram áður. Þetta voru frumvörp um þjónustu við fatlað fólk með miklar stuðningsþarfir (nafni frumvarpsins var síðar breytt: við fatlað fólk með langvarandi stuðningsþarfir) og frumvarp um félagsþjónustu sveitarfélaga. Var meðferð frumvarpanna með þeim hætti að þau voru

samferða í gegnum 1. umræðu og við meðferð þeirra í nefndum. Fyrri frumvarpið, um þjónustu við fatlað fólk með langvarandi stuðningsþarfir, fól í sér innleiðingu á NPA-þjónustuforminu (notendastýrð persónuleg aðstoð), en það felur í sér eina stærstu framför í einstaklingsmiðaðri þjónustu við fatlað fólk. Halldóra Mogensen, þingmaður Pírata og formaður velferðarnefndar lagði af hendi mikla vinnu til að tryggja að innleiðingin á NPA, sem og aðrar breytingar sem var að finna í frumvarpinu, færu sem best fram. Því miður var staðreyndin sú að frumvörpin voru haldin ýmsum ágöllum þegar þau voru lögð fram. Þá var alvarlegur skortur á samráði við fatlað fólk við vinnslu frumvarpanna hjá ráðuneytinu en í samningi um réttindi fatlaðs fólks, sem Ísland er aðili að, er kveðið á um skyldu til að hafa samráð við fatlað fólk við undirbúning á löggjöf. Unnið var að því að tryggja eins mikla aðkomu fatlaðs fólks eins og hægt var við vinnslu frumvarpanna í nefnd auk þess sem að nauðsynlegir gallar voru lagfærðir. Umsagnir um málin voru bæði margar og ítarlegar eins og frumvörpin sjálf. Að lokum lagði nefndin fram samhljóma breytingar á málunum sem voru afgreiddar í þingsal og urðu frumvörpin að lögum.

Skipan dómara í Landsrétt og [vantrauststillaga á dómismálaráðherra](#)

Með lögum nr. 50/2016 var komið á fót nýju dómstigi, Landsrétti, sem tók til starfa 1. janúar 2018 og hefur verið starfandi síðan þá. Áður en að dómstóllinn tók til starfa voru dómarar skipaðir í réttinn, en sú skipun fór fram við lok 146. löggjafarþings. Samkvæmt lögnum skyldi skipa 15 dómara áður en að rétturinn tæki til starfa. Dómismálaráðherra fékk tillögur að aðilum sem voru metnir hæfir af dómnefnd, en dómismálaráðherra ákvað að gera breytingar á tillögunum með þeim hætti að fjórum úr hópi 15 hæfustu var skipt út fyrir fjóra aðra sem voru metnir síður hæfir. Ráðherra færði fjögur rök fyrir þessari breytingu: 1) kynjasjónarmið, 2) dómareynsla, 3) lögmannsreynsla, og 4) að það væri nauðsynlegt að horfa upp úr Excel skjölum. Fyrstu rökin eru ógild þar sem tveimur körlum var skipt út fyrir tvo aðra karla. Önnur og þriðju rökin eru ógild þar sem horft var framhjá öðrum aðilum sem voru metnir meira hæfir sem höfðu jafn mikla eða meiri dómara- og lögmannsreynslu en þeir sem voru færðir upp. Fjórdi rökin eru ekki rök, heldur ósk um að hentisemi ráðherra verði látin óafskipt þrátt fyrir skort á raunverulegum rökum. Umsækjendur voru ekki færðir úr 15 manna hópnum eftir hæfni, heldur að því er virðist eftir hentisemi - m.a. var umsækjandinn í 7. sæti samkvæmt mati dómnefndarinnar færður. Það virðist augljóst að um pólitíska geðþóttaákvörðun hafi verið að ræða, ekki síst þegar litið er til pólitískrar sögu þeirra sem voru látnir víkja, og tengslum sumra þeirra sem komu í staðinn. Píratar mótmældu þessu fyrirkomulagi harðlega og kröfðust þess að dómismálaráðherra rökstyddi tillögu sína með raunverulegum hætti, í samræmi við lög, eða dragi öðrum kosti breytingar sínar til baka. Við því var ekki orðið og atkvæðagreiðslan fékk að fara í gegn án þess að aðrir en lítill hluti þingmanna hafi fengið að sjá gögnin sem lágu niðurstöðunni til grundvallar.

Eftir lok 146. löggjafarþings hafa embættisfærslur dómismálaráðherra við skipan dómara verið dæmdar ólöglegar og í andstöðu við stjórnsýslulög af Hæstarétti. Með því er ljóst að dómismálaráðherra braut lög við skipanina, rétt eins og Píratar vörðu þá við. Með því skapaðist mikil réttaróvissa um það hvert vægi dóma hins nýja millidómstigs yrði, enda margir sem hafa haldið því fram að skipanin í réttinn vegi að rétti einstaklinga til að hljóta réttláta málsmeðferð fyrir óháðum og óhlutdrægum dómstólum, sem er varinn í 1. mgr. 70. gr. stjórnarskrárinnar og 1. mgr. 6. gr. Mannréttindasáttmála Evrópu. Þegar þessi skýrsla er

rituð hefur íslenska ríkið þegar verið kært fyrir Mannréttindadómstóli Evrópu fyrir að brjóta gegn Mannréttindasáttmála Evrópu og hefur dómstóllinn ákveðið að taka málið fyrir og veita því forgang, vegna þess hversu mikilvægir hagsmunir liggja þar undir. Ef að dómstóllinn kemst að þeirri niðurstöðu að íslenska ríkið hafi ekki tryggt borgurum réttinn til að hljóta réttláta málsmeðferð munu afleiðingarnar verða gífurlegar.

Þingflokkur Pírata beitti sér af miklum þunga á fyrri hluta ársins 2018 til að krefjast þess að ráðherra axlaði ábyrgð á embættisfærslum sínum. Þannig hafði stjórnskipunar- og eftirlitsnefnd málið til skoðunar, auk þess sem umboðsmaður Alþingis tók það til athugunar. Þar sem ráðherra sýndi enga viðleitni til þess einu sinni að viðurkenna að hann hefði mögulega gert mistök og heldur ekki til að axla ábyrgð eða að vinna að því að tryggja betur rétt einstaklinga til að hljóta réttláta málsmeðferð lögðu þingmenn Samfylkingarinnar og Pírata fram [vantrauststillögu](#) á hendur dómsmálaráðherra. Tillagan var felld með 33 atkvæðum gegn 29, 1 greiddi ekki atkvæði. Niðurstöðu málsins má lýsa þannig að meiri hluti þingsins hafi samþykkt vinnubrögð ráðherra og orðræðu hans síðan. Þannig ber meiri hluti sem samanstendur af þingmönnum Sjálfstæðisflokks, Framsóknarflokks og 9 þingmanna Vinstri grænna ábyrgð á því ástandi sem ríkir nú.

Barnaverndarmál (og framboð Braga Guðbrandssonar til barnaréttarnefndar SP)

Í febrúar 2018 tók félags- og jafnréttismálaráðherra nokkrar ákvarðanir um aðgerðir á sviði barnaverndarmála sem mundu hafa viðtækar afleiðingar. Þess má geta að þá hafði staðið yfir um nokkurn tíma athugun velferðarráðuneytisins vegna kvartana sem bárust frá barnaverndarnefndum vegna starfshátta Barnaverndarstofu og forstjóra hennar, Braga Guðbrandssyni. Í tilkynningu frá ráðuneytinu kom fram að athugun á málinu væri lokið og voru á vef ráðuneytisins birt bréf til barnaverndarnefndanna sem og Barnaverndarstofu. Ekki var upplýst um hvort að ráðherra hefði gripið til aðgerða gegn forstjóra Barnaverndarstofu. Á sama tíma var ákveðið var að leggja til að Bragi Guðbrandsson yrði frambjóðandi Íslands til barnaréttarnefndar Sameinuðu þjóðanna, en framboðið var síðar stutt af öllum norðurlöndunum. Var þessi tilhögun samþykkt á fundi ríkisstjórnarinnar 23. febrúar. Þá var einnig tekin ákvörðun um að Bragi Guðbrandsson skyldi vinna að verkefnum fyrir velferðarráðuneytið sem sneru að væntanlegum breytingum á sviði barnaverndar.

Í ljósi þess að rannsókn á störfum Braga Guðbrandssonar hafði verið nýlega lokið og að hann hefði verið valin í tvö mikilvæg hlutverk varðandi barnaverndarstörf án þess að sérstaklega hefði verið greint frá niðurstöðum rannsóknarinnar taldi velferðarnefnd rétt að kalla félags- og jafnréttismálaráðherra á fund nefndarinnar til að fara yfir málið. Hann mætti á fund nefndarinnar þann 28. febrúar 2018 ásamt starfsmönnum velferðarráðuneytisins og fjallaði um málið. Í kjölfar fundarins taldi velferðarnefnd skynsamlegt að fá fram frekari upplýsingar um málið og þá sérstaklega sjónarmið þeirra barnaverndarnefnda sem höfðu lagt fram kvartanir á hendur Barnaverndarstofu. Kallaði því nefndin á fund sinn fulltrúa frá barnaverndarnefndum Reykjavíkur, Kópavogs og Hafnarfjarðar. Komu þau á fund nefndarinnar þann 14. mars 2018 og svöruðu spurningum nefndarmanna. Vegna eðli starfa barnaverndarnefnda og þeirrar miklu trúnaðarskyldu sem ríkir um störf þeirra voru miklar takmarkanir á þeim umræðum sem fram gátu farið og því ýmsir þættir í málinu enn

óupplýstir. Taldi Halldóra Mogensen, formaður nefndarinnar, í kjölfar gestakomu ljóst að upplýsingar væru að finna hjá ráðuneytinu sem myndu varpa frekari ljósi á lyktir rannsóknar ráðuneytisins. Upplýsingar sem nauðsynlegt væri að kæmu fram áður en að Braga Guðbrandssyni yrði boðið á fund nefndarinnar og að velferðarnefnd gæti svo lokið sinni skoðun.

Þann 21. mars 2018 lagði Halldóra Mogensen, formaður nefndarinnar, fram tvær tillögur um upplýsingabeiðnir á grundvelli 1. mgr. 51. gr. laga um þingsköp. Beiðnirnar sneru að tilteknum þáttum í barnavernd sem vörðuðu þau mál sem nefndin hafði haft til umfjöllunar. Beiðnirnar voru studdar af Guðmundi Inga Kristinssyni og Jónínu Björgu Magnúsdóttur og sendar velferðarráðuneytinu. Svör við beiðnunum, með tilheyrandi gögnum, bárust nefndinni 24. apríl 2018.

Þann 27. apríl 2018 birti fjölmiðillinn Stundin gögn og umfjöllun um þau mál sem velferðarnefnd hafði haft til athugunar. Gögnin bentu til þess að félags- og jafnréttismálaráðherra hefði ekki veitt nefndinni fullnægjandi upplýsingar á fundi nefndarinnar þann 28. febrúar 2018. Af þeirri ástæðu boðaði formaður nefndarinnar til opins fundar með ráðherra þar sem nefndarmenn spurðu ráðherra um aðkomu hans að málum forstjóra Barnaverndarstofu og barnaverndarnefnda og upplýsingaveitu hans til Alþingis og velferðarnefndar. Halldóra Mogensen, formaður nefndarinnar og þingmaður Pírata, var fyrst til að beina fyrirspurnum til Braga, en þar spurði hún ráðherra ítrekað hvort hann hefði beint tilmælum til Braga. Ráðherra varðist því að svara spurningunni beint í fyrstu en sagði svo að hann gæti ekki svarað þar sem hann hafði ekki gögnin fyrir framan sig. Ráðherra var svo spurður sömu spurningar í Kastljósi sama kvöld og kom þá í ljós að ráðherra hafði beint tilmælum til Braga í kjölfar þess að skrifstofa félagsþjónustu komst að þeirri niðurstöðu að Bragi Guðbrandsson hefði sem forstjóri Barnaverndarstofu farið út fyrir starfssvið sitt. Ljóst var að ráðherra hefði þá ekki veitt nefndinni þessar upplýsingar áður þrátt fyrir að hafa áður fundað með nefndinni og fjallað um málið ítrekað í þingsal.

Nefndin fundaði með Braga Guðbrandssyni þann 2. maí 2018 til að varpa ljósi á hans sjónarmið í málinu.

Ljóst var að forstjóri Barnaverndarstofu hafði brotið af sér í starfi og að nauðsynlegt hefði verið fyrir ráðherra að beina sérstækum tilmælum til hans. Eðli brotanna var þó ekki ljóst og hversu alvarleg þau væru. Í umfjöllun fjölmiðla um málið höfðu komið fram upplýsingar um störf hans, sem ef sönn væru, gætu kastað alvarlegri rýrð á trúverðugleika og stöðu hans sem fulltrúi fyrir Íslands hönd í barnaréttarnefnd Sameinuðu þjóðanna. Þingflokkur Pírata taldi nauðsynlegt að málið yrði upplýst frekar áður en að sú ákvörðun yrði tekin um kjör Braga í nefndina. Í kjölfar umfjöllunarinnar [tilkynnti](#) forsætisráðuneytið um að fram færi óháð úttekt á málum á sviði barnaverndar. Í tilkynningunni kom fram að úttektin sneri að málum á sviði barnaverndar hér á landi, sem verið hafa til umfjöllunar í velferðarráðuneytinu og hjá velferðarnefnd Alþingis. Þá kom fram að úttektin væri unnin að ósk félags- og jafnréttismálaráðherra. Þá sagði að farið yrði yfir fyrirliggjandi gögn málsins og málsmeðferð viðkomandi stjórnvalda, þ.e. þeirra barnaverndarnefnda sem tengjast viðkomandi málum, Barnaverndarstofu og velferðarráðuneytis. Forsætisráðherra kom því skýrt til skila að beðið yrði eftir niðurstöðum úttektarinnar áður en ákveðið yrði hvort ríkisstjórnin myndi áfram styðja

framboð Braga Guðbrandssonar til barnaréttarnefndar Sameinuðu þjóðanna. Vegna boðunar þessarar óháðu úttektar taldi velferðarnefnd réttast að gera hlé á sinni skoðun á meðan úttektin færi fram.

Það sem ekki kom fram í þessari tilkynningu forsætisráðuneytisins, [en kom fram síðar](#), var að úttektaraðili var með beinan verksamning við félags- og jafnréttismálaráðuneytið um úttektina, ekki forsætisráðuneytið, eins og hefði mátt ætla af málflutningi forsætisráðherra. Þá var verklýsing úttektarinnar á þann veg að hún náði ekki til allra þeirra hluta sem boðað hefði verið á vef forsætisráðuneytisins í ofangreindri tilkynningu. Úttektin sneri aðeins að meðferð ráðuneytisins á kvörtunum um Braga. Þannig gerði hún ekkert til þess að varpa frekara ljósi á störf Braga sjálfs og með hvaða hætti hann hefði brotið af sér í starfi. Í raun er það enn óupplýst í dag hver brot hans voru og hvað var satt í upprunalegri fréttaumfjöllun Stundarinnar.

Þrátt fyrir að mál Braga Guðbrandssonar séu enn í rannsóknarfarvegi innan velferðarráðuneytisins var hann kjörinn í nefnd Sameinuðu þjóðanna um réttindi barnsins til fjögurra ára á fundi aðildarríkja barnasáttmálans sem fram fór í New York þann 29. júní.

[Þingflokkur Pírata sendi frá sér ítarlega yfirlýsingu um málið í kjölfar þess að niðurstöður óháðu úttektarinnar lágu fyrir og var yfirlýsingin birt í fjölmiðlum.](#)

Almenna persónuverndarreglugerðin (GDPR)

Á 148. löggjafarþingi voru samþykkt ný lög um persónuvernd og vinnslu persónuupplýsinga, en lögin fela í sér innleiðingu á almennu persónuverndarreglugerðinni, sem er ESB reglugerð sem nú hefur verið innleidd um alla Evrópu. Með lögunum og reglugerðinni sem þau byggja á er tekið stærsta stökk fram á við í persónuvernd, raunverulega felur hún í sér ákveðna byltingu í verndun og meðferð persónuupplýsinga.

Þrátt fyrir það hversu mikil réttarbót frumvarpið kunni að vera fyrir einstaklinga og vernd persónuupplýsinga verður að víkja að meðferð málsins á Íslandi. Nauðsynlegt er að rekja að einhverju leyti forsögu þess, enda var þingleg meðferð þess verið afar óvenjuleg. Reglugerðin var samþykkt í Evrópuþinginu þann 27. apríl 2016 (undirbúningur hafði þá staðið yfir um margra ára skeið) með fyrirhugaðri gildistöku þann 25. maí 2018. Þann 21. nóvember 2017 skipaði dómsmálaráðherra fimm manna starfshóp sem falið var að semja frumvarp til innleiðingar á reglugerðinni. Það er ámælisvert að starfshópurinn hafi ekki verið skipaður fyrr en um einu og hálfu ári eftir samþykkt reglugerðarinnar til þess að semja frumvarpið, þegar það lá fyrir löngu áður að Íslandi yrði skylt að innleiða reglugerðina. Núverandi dómsmálaráðherra hefur setið síðan 11. janúar 2017 og hefði henni þá strax átt að vera ljóst mikilvægi þess að standa vel að vinnunni við innleiðingu á reglugerðinni. Starfshópurinn skilaði frumdrögum að frumvarpi til dómsmálaráðherra til kynningar 26. janúar 2018 og fullbúnu frumvarpi 13. apríl 2018.

Þingmenn Pírata beindu því ítrekað til dómsmálaráðherra á upphafsmánuðum 148. löggjafarþings hversu mikilvægt væri að frumvarpið yrði lagt fram nógu snemma til að hljóta

góða og faglega meðferð í þinginu. Það var ítrekað varað við því að leggja málið fram of seint. Ef það yrði gert yrði málið rætt í tímaþröng og það kynni að vega að möguleika almennings til að koma að athugasemdum um málið í formi umsagna. Slík flýtvinnna kynni einnig að leiða til mistaka við lagasetningu. Svo fór að frumvarpið var lagt fram 28. maí, einungis fáeinum dögum fyrir þinglok. Í samningaviðræðum um þinglok beitti þingflokksformaður Pírata, Þórhildur Sunna Ævarsdóttir, sér fyrir því að tryggja að nægur umsagnartími yrði um málið. Svo fór að umsagnartími varð 8 dagar og lengdi þar með 148. löggjafarþing um nokkra daga. Alls voru sendar 298 umsagnarbeiðnir, en 45 umsagnir bárust. Nefndu næstum allar umsagnirnar að erfitt væri að vinna umsögn um svo stórt mál á svo stuttum tíma. Að sama skapi voru fundir allsherjar- og menntamálanefndar með þeim hætti að mikið þurfti að vinna af athugasemdum og breytingartillögum á mjög stuttum tíma.

Til þess að tryggja góða yfirferð yfir frumvarpið tók þingflokkur Pírata ákvörðun um að ráða tímabundið verktaka til að vinna minnisblað um málið. Í minnisblaðinu yrði að finna almenna samantekt um GDPR og reifun helstu áhrifa á íslenskt samfélag, lagagreinar þar sem aðildarríki hafa heimild til að útfæra nákvæma tilhögun og samiburður á íslenskri útfærslu og frá ESB, lagagreinar sem hafa sérstaka skírskotun til grunnstefnu Pírata og samþykktar stefna Pírata, auk þess sem athugað yrði hvort að í frumvarpinu væri að finna ákvæði sem gætu teflst núverandi persónuvernd í hættu og að öll ákvæði fylgi meðalhöfsreglu. Mikilvægt var að minnisblaðið yrði unnið mjög hratt, og að það yrði tilbúið á sama tíma og málið færi í 2. umræðu. Þingflokkurinn tók ákvörðun um ráðningu Sunnu Rós Víðisdóttur í verkefnið, en Sunna Rós er lögfræðingur með sérþekkingu á almennu persónuverndarreglugerðinni. Þá hefur hún sinnt ýmsum störfum fyrir Pírata og sat m.a. sem formaður framkvæmdaráðs um tíma. Þingflokkur Pírata vill þakka henni fyrir vel unnin störf.

Við meðferð málsins í nefndinni var mögulegt að koma til móts við öll helstu sjónarmið sem þingflokkur Pírata lagði fram. Því skrifaði nefndarmaður Pírata í allsherjar- og menntamálanefnd, Þórhildur Sunna Ævarsdóttir, undir [nefndarálit](#) með fyrirvara. Lögin voru samþykkt frá Alþingi 13. júní 2018.

Kjararáð

Daginn eftir Alþingiskosningarnar árið 2016 tilkynnti kjararáð um umtalsverða hækkun á launum þingmanna og ráðherra, eða nærri 45%. Þingflokkur Pírata fjallaði um málið á 146. þingi og barðist fyrir því að fá ákvörðunina endurskoðaða. Jón Þór Ólafsson og þingflokkur Pírata lagði frumfrumvarp um breytingar á lögum um kjararáð sem miðuðu að því að leiðrétta launin og skerpa á skyldum Kjararáðs. Mælt var fyrir málinu og var því vísað til efnahags- og viðskiptanefndar en komst það aldrei úr nefnd. Í kjölfarið lýsti Jón Þór Ólafsson því yfir að hann hygðist kæra kjararáð þar sem hann taldi hækkanir á launum ráðamanna ólögsmætar og til þess fallnar að skapa ósætti á vinnumarkaði og ýta undir frekar kjaradeilur á komandi misserum. Svo fór að málið var tekið fyrir en íslenska ríkið krafðist frávísunar á málinu fyrir dómi þar sem að stefnendur (Jón Þór Ólafsson og stéttarfélag VR) væru ekki aðilar máls. Svo fór að frávísunarkrafan var samþykkt en með því væri þá komið fordæmi fyrir því að enginn gæti átt aðild að máli og þannig ekki hægt að fá ákvörðunum kjararáðs hnekkt fyrir dómstólum. Með því höfðu allir þrír armar ríkisvaldsins lagt blessun sína á gríðarlegar launahækkanir ráðamanna árið 2016, þ.e. framkvæmdavaldið (sem kjararáð

heyrir undir), löggjafarvaldið (sem neitaði að afturkalla ákvarðanir kjararáðs eða gera þeim að taka nýjar ákvarðanir) og dómsvaldið (sem vísaði frá dómsmáli um ógildingu á ólögsmætum hækkunum kjararáðs).

Á 148. löggjafarþingi var lagt fram frumvarp um niðurfellingu kjararáðs. Óljóst er að hve miklu leyti aðgerðir þingflokks Pírata og sérstaklega Jón Þórs Ólafssonar kunni að hafa haft á ákvörðunina um að leggja fram það frumvarp. Frumvarpið var flutt af meiri hluta efnahags- og viðskiptanefndar. Jón Þór Ólafsson lagði fram breytingartillögu við frumvarpið sem myndi skylda kjararáð, áður en það yrði lagt niður, til þess að kveða upp úrskurð um launalækkun alþingismanna og ráðherra sem samsvari því að laun þeirra fylgi almennri launaþróun frá 11. júní 2013. Breytingartillagan var felld í atkvæðagreiðslu með 49 atkvæðum gegn 14. Þannig var ljóst að meiri hluti þingheims vildi standa vörð um hækkanir kjararáðs á eigin launum.

Rafrettur

Á 148. löggjafarþingi var lagt fram frumvarp um rafrettur og áfyllingar fyrir þær. Frumvarp um sama efni hafði áður verið lagt fram á 146. þingi af þáverandi heilbrigðisráðherra, Óttari Proppé. Svo fór að frumvarpið komst ekki til afgreiðslu þá, m.a. vegna andstöðu þingflokks Pírata. Það frumvarp sem lagt var fram nú var haldið að miklu leyti sambærilegum eða sömu göllum og síðasta frumvarpið. Frumvarpið fól í sér innleiðingu á ESB reglugerð sem Íslandi var þó ekki skylda til að innleiða, en reglugerðin ([nr. 2014/40/ESB](#)) hafði þegar fengið umtalsverða gagnrýni fyrir að vera svo ströng og fela í sér svo viðamiklar takmarkanir á notkun rafrettna að dregið yrði verulega úr áhrifamætti þeirri sem skaðaminnkunarræði fyrir þá sem vilja nýta sér til að hætta að reykja. Eftir 1. umræðu um málið var frumvarpinu vísað til velferðarnefndar þar sem Halldóra Mogensen, þingmaður Pírata, sinnir formennsku. Málið fékk mikla athygli og barst mikill fjöldi umsagna um það ([70 erindi og umsagnir](#)). Halldóra Mogensen lagði mikla áherslu á við meðferð málsins að fá fram öll mikilvægustu sjónarmið og gætti að því að allir fagaðilar sem gætu frætt nefndarmenn um málið kæmu á fund nefndarinnar.

Nefndin klotnaði við afgreiðslu málsins þar sem [meiri hluti lagði til](#) að setja enn strangari reglur um notkun og sölu rafrettna en upprunalega var gert ráð fyrir í málinu. Minni hlutinn lagði til nauðsynlegar lagfæringar, en undir [nefndaráliti minni hlutans](#) skrifuðu Halldóra Mogensen (framsögumaður), Anna Kolbrún Árnadóttir og Guðmundur Ingi Kristinsson. Í nefndaráliti eru reifuð frekar öll helstu sjónarmið varðandi það hverju var nauðsynlegt að breyta í frumvarpinu.

Þegar styttest í þinglok lagði þingflokkur Pírata mikla áherslu á að ná fram nauðsynlegum breytingum á frumvarpinu áður en að það yrði að lögum. Svo fór að samkomulag náðist á milli meiri hluta og minni hluta nefndarinnar um að leggja fram [framhaldsnefndarálit](#), auk þess að tiltekna breytingar í nefndaráliti meiri hlutans yrðu felldar út og að tiltekna breytingar í nefndaráliti minni hlutans yrðu samþykktar. Þegar frumvarpið var loks samþykkt í þingsal hafði náðst að gera á því mikilvægar breytingar sem gætu tryggt það að rafrettur yrðu áfram öflugt skaðaminnkandi úrræði fyrir alla þá sem kysu að nota þær.

Frammistöðubætandi efni (sterafrumvarpið)

Lagt var fram í annað skipti frumvarp sem hafði það að markmiði að banna tiltekin frammistöðubætandi efni og lyf. Frumvarpið lagði til að varsla og meðferð efnanna yrði refsiverð með allt að 2 ára fangelsisvist. Fól frumvarpið þannig í sér nýjar refsingar við brotum sem varða meðferð ólöglegra efna. Frumvarp þetta var nú lagt fram í annað skipti, en það hafði áður verið lagt fram á 146. þingi. Þá dró ráðherra frumvarpið til baka eftir að velferðarnefnd hafði lagt fram framhaldsnefndarálit sem fæli í sér refsileysi fyrir einstaklinga sem væru með minna en 10 dagskammta af efnunum til eigin neyslu.

Frumvarpið var nú lagt fram í annað skipti og hefði það orðið óbreytt að lögum hefði það leitt til þess að nýjar heimildir væru í lögum til refsinga gagnvar neytendum ólöglegra lyfja og efna. Taldi þingflokkur Pírata að slíkt væri afar óheppilegt enda í ósamræmi við stefnu um afgangspavæðingu.

Við fyrstu afgreiðslu málsins úr velferðarnefnd klofnaði nefndin. Lagði meiri hlutinn til að málið yrði [samþykkt óbreytt](#). Minni hluti nefndarinnar lagði til sambærilega breytingu og á 146. þingi þar sem [refsilaust yrði að vera með 10 dagskammta](#) eða minna þegar efnin væru ætluð til eigin neyslu. Þingflokkur Pírata beitti sér fyrir því að unnin yrði málamiðlun sem fæli í sér að ekki yrðu sett í lög nýjar refsheimildir til handa neytendum ólöglegra efna og lyfja. Svo fór að lögð var fram [breytingartillaga](#) af Ólafi Þór Gunnarssyni, varaformanni velferðarnefndar sem fól það í sér að varsla og meðferð efnanna yrði aðeins refsiverð þegar haldlagt magn efna væri umfram það sem talist gæti til eigin neyslu. Breytingartillagan var síðar samþykkt. Frumvarpið varð að lögum með umræddri breytingartillögu. Með því var komið fyrsta fordæmi fyrir refsileysi fyrir eigin neyslu ólöglegra efna í íslensk lög og fagnar þingflokkur Pírata því. Mun hann áfram beita sér fyrir afgangspavæðingu allra vímuefna.

Störf fastanefnda Alþingis

Stór hluti þingstarfanna fer í raun ekki fram í þingsal, heldur í fastanefndum og alþjóðanefndum þingsins. Allir þingmenn eiga sæti í það minnsta einni nefnd, og sumir í fleiri nefndum. Alls eru fastanefndir Alþingis átta talsins, en auk þess hittist forsætisnefnd reglulega, sem í sitja forseti Alþingis ásamt öllum varaforsetum.

Allsherjar- og menntamálanefnd

Nefndarmaður Pírata: Þórhildur Sunna Ævarsdóttir

Nefndin fjallar um dóms- og löggæslumál, mannréttindamál, ríkisborgararétt, neytendamál, málefni þjóðkirkjunnar og annarra trúfélaga og jafnréttismál, svo og um mennta- og menningarmál og vísinda- og tæknimál.

Á 148. löggjafarþingi hafi allsherjar- og menntamálanefnd mörg veigamikil mál til umfjöllunar. Eitt þeirra hefur þegar verið reifað hér að ofan, þ.e. almenna persónuverndarreglugerðin. Sem dæmi um önnur mál sem samþykkt voru á 148. þingi eftir viðkomu í allsherjar- og menntamálanefnd má nefna ný lög um Þjóðskrá Íslands, ný lög um lögheimili og aðsetur,

bann við mismunun (lög um jafna meðferð óháð kynþætti og þjóðernisuppruna og lög um jafna meðferð á vinnumarkaði) og þingsályktunartillögu um þjóðarsátt um bætt kjör kvennastétta. Eins og áður hefur verið nefnt var mál þingflokks Pírata um stafrænar smiðjur samþykkt eftir viðkomu í allsherjar- og menntamálanefnd.

Nefndin lagði tvívegis til veitingu ríkisborgararéttar, samkvæmt venju, og fengu 145 einstaklingar ríkisborgararétt með lögum í kjölfarið; [76 í fyrra skiptið](#), [69 í því síðara](#).

Þingflokkur Pírata lagði fram mikinn fjölda mála sem vísað var til allsherjar- og menntamálanefndar, alls 8 þingmál. Mál Pírata í nefndinni:

Mál 63: [Kyrrsetning, lögbann o.fl. \(lögbann á miðlun fjölmiðils\)](#)

Málið kom til allsherjar- og menntamálanefndar þann 21. desember 2017. Umsagnarbeiðnir voru sendar 28. desember, en alls bárust 7 umsagnir um málið. Málið var á dagskrá á 7 einstökum nefndarfundum og var því rætt í nokkru máli. Vinna var hafin við nefndarálit og breytingartillögur en ekki náðist sátt um að afgreiða málið úr nefnd.

Mál 37: [Almenn hegningarlög \(stafrænt kynferðisofbeldi\)](#)

Málið kom til nefndar 31. janúar. Umsagnarbeiðnir voru sendar 12. febrúar og bárust alls 9 umsagnir. Málið var rætt á þremur nefndarfundum en ekki náðist samstaða um afgreiðslu málsins.

Mál 36: [Höfundalög \(sjálfvirk gagnagreining\)](#)

Málið kom til nefndar 7. febrúar. Umsagnarbeiðnir voru sendar þann 14. febrúar. Nokkur fjöldi umsagna barst, alls 14. Málið var ekki tekið á dagskrá nefndarinnar og var því ekki afgreitt.

Mál 134: [Helgidagafriður](#)

Málið kom til nefndar 20. febrúar. Umsagnarbeiðnir voru sendar 28. febrúar. Alls bárust 5 umsagnir um málið en ekki tókst að afgreiða það úr nefnd.

Mál 150: [Stjórnartíðindi og Lögbirtingablað \(opin gögn\)](#)

Málið kom til nefndar 21. febrúar. Umsagnarbeiðnir voru sendar 28. febrúar. Alls bárust 2 umsagnir um málið en ekki tókst að afgreiða það úr nefnd.

Mál 127: [Áfengislög \(afnám banns við heimabruggun til einkaneyslu\)](#)

Málið kom til nefndar 20. febrúar. Umsagnarbeiðnir voru sendar 1. mars. Alls bárust 16 umsagnir. Ekki náðist samstaða um að afgreiða málið úr nefnd.

Mál 269: [Kristnisjóður o.fl. \(ókeypis lóðir\)](#)

Málið kom til nefndar 26. apríl. Umsagnarbeiðnir voru sendar 3. maí en alls bárust 6 umsagnir. Ekki náðist samstaða um afgreiðslu málsins úr nefnd.

Mál 236: [Aðgengi að stafrænum smiðjum](#)

Eins og nefnt hefur verið áður var þetta eina þingmál Pírata sem var samþykkt og afgreitt í þingsal. Málið kom til nefndarinnar 1. mars og voru umsagnarbeiðnir sendar 6. og 7. mars.

Alls bárust 11 umsagnir. Samstaða náðist í nefndinni um að vinna að sameiginlegu nefndarálit, en í því voru lagðar til breytingar til að bregðast við athugasemdum sem komu fram í umsögnum. Breytingarnar voru síðar samþykktar, en þær fólu í sér ákveðna útvíkkun á gildissviði þingsályktunarinnar og ber að fagna því. Nefndarálit með breytingartillögum var afgreitt frá nefndinni 31. maí og var tillagan samþykkt í þingsal 6. júní.

Atvinnuveganefnd

Nefndarmaður Pírata: Smári McCarthy

Nefndin fjallar um sjávarútvegsmál, landbúnaðarmál, iðnaðar- og orkumál, nýsköpun og tækniþróun, atvinnumál almennt og einnig nýtingu auðlinda á grundvelli rannsókna og ráðgjafar.

Mál Pírata í nefndinni:

191. mál: [Fjárfestingar í rannsóknum og þróun](#)

Málið komst til nefndar 22. febrúar 2018. Nefndin kallaði eftir umsögnum um málið og tvær bárust. Ekki tókst að afgreiða málið úr nefnd fyrir þinglok.

Efnahags- og viðskiptanefnd

Nefndarmaður Pírata: Helgi Hrafn Gunnarsson

Nefndin fjallar um efnahagsmál almennt, viðskiptamál, þ.m.t. bankamál, fjármálastarfsemi og lífeyrismál, svo og skatta- og tollamál.

Mál Pírata í nefndinni:

12. mál: [Ársreikningar og hlutafélög \(aukinn aðgangur að ársreikningaskrá og hlutafélagaskrá\)](#)

Flutningsmaður: Björn Leví Gunnarsson

Málið komst til nefndar 1. febrúar 2018. Umfjöllun nefndarinnar var lokið og hafin var vinna við drög að nefndarálit. Ekki tókst að afgreiða málið úr nefnd fyrir þinglok.

13. mál: [Rafræn fasteignaviðskipti og ástandsskýrslur fasteigna](#)

Flutningsmaður: Björn Leví Gunnarsson

Málið komst til nefndar 1. febrúar 2018. Umfjöllun nefndarinnar var lokið og drög að nefndarálit tilbúin sem höfðu fengið eina umferð af umræðu af nefndinni og gerðar höfðu verið uppfærslur í samræmi við ábendingar nefndarmanna. Ekki tókst að afgreiða málið úr nefnd fyrir þinglok.

192. mál: [Lágskattaríki](#)

Flutningsmaður: Smári McCarthy

Málið komst til nefndar 22. mars 2018. Nefndin hafði sent málið til umsagnar og var umsagnarfrestur liðinn. Ekki tókst að afgreiða málið úr nefnd fyrir þinglok.

Fjárlaganefnd

Nefndarmaður Pírata: Björn Leví Gunnarsson

Mál nefndarinnar

- 1. mál: Fjárlög 2018
- 66. mál Fjárukalög 2017
- 49. mál Lokafjárlög 2016
- 167.mál Markaðar tekjur

Fjárlaganefnd fjallar ekki um mörg ár á hverju ári en hvert þeirra er þó nokkuð umfangsmikið með margar umsagnir og gesti. Helstu áherslur Pírata í fjárlaganefnd á 148. löggjafarþingi voru eftirlitsmál. Eftirlit með framkvæmd fjárlaga, upplýsingabeiðnir um ýmis málefni líðandi stundar og almennt aðhald með framkvæmdavaldinu. Dæmi um upplýsingabeiðnir í fjárlaganefnd:

- Sundurliðun á menningarstyrkjum eftir staðsetningu
- Minnisblað vegna stofnkostnaðar Landsréttar
- Minnisblað vegna smíði á nýjum Herjólf
- Minnisblað vegna aðgerðaáætlunar gegn kynferðisbrotum
- Upplýsingar um allar styrkjabeiðnir vegna fjárlaga
- Minnisblað um kostnað samgöngumannvirkja og fjármögnun á undanförunum árum
- Upplýsingar um notkun varasjóða
- Ósk um fund eftirlitsaðila ríkisins í stjórn Arion banka
- Gagnabeiðni vegna ríkisábyrgðar á Vaðlaheiðargöngum (nokkrar spurningar)
- Minnisblað frá heilbrigðisráðuneyti um verktakagreiðslur til lækna vegna starfa á landsbyggðinni.
- Minnisblað um Lindarhvol
- Upplýsingar um greiðslur erlendra ferðamanna til heilbrigðisstofananna
- Upplýsingar vegna vanefnda á greiðslum til framhaldsskóla vegna kjarasamninga framhaldsskólakennara
- Minnisblað um grunndæmi fjármálaáætlunar
- Beiðni um opin fund með fjármálaráði
- Upplýsingar um framkvæmd úthlutunar á dagpeningum
- Umfjöllun um skýrslu Ríkisendurskoðunar vegna heilsugæslu á landsbyggðinni
- Umfjöllun um úthlutun úr almennum varasjóði vegna samgönguviðhaldsverkefna

Hlutverk fjárlaganefndar er að fjalla um fjármál ríkisins, fjárveitingar, eignir ríkisins, lánsheimildir og ríkisábyrgðir og lífeyrisskuldbindingar ríkissjóðs. Enn fremur skal nefndin annast eftirlit með framkvæmd fjárlaga. Það þýðir að fara yfir rökstuðning ríkisstjórnarinnar vegna beiðni um fjárheimildir og fylgjast svo með því hvort fjárheimildirnar eru notaðar samkvæmt samþykktri stefnu og lögum.

Fyrir nokkrum árum voru sett ný lög um opinber fjármál. Tilgangur þeirra var að reyna að koma í veg fyrir áralanga yfirkeyrslu á fjárheimildum. Statt og stöðugt hafa útgjöld ríkisins verið vel umfram fjárlög. Það er hins vegar ekki nóg að setja lög því ef fjárlaganefnd og Alþingi sinna ekki eftirlitshlutverki sínu þegar ríkisstjórnin fer umfram fjárheimildir þá breytist ekki neitt. Nýlega var til dæmis úthlutað úr almennum varasjóði í viðhaldsverkefni í

samgöngukerfinu. Vissulega nauðsynlegt verkefni en það einfaldlega má ekki nota almenna varasjóðinn nema ákveðnum skilyrðum er uppfyllt. Hvorki fjármálaráðherra né samgönguráðherra rökstuddu úthlutunina úr varasjóðnum mtt. laga um opinber fjármál og þau skilyrði sem þar gilda um almenna varasjóðinn. Sögðust bara sannfærðir um að úthlutunin uppfyllti öll skilyrði án þess að til væri texti sem sagði að skilyrðin væru uppfyllt "af því að...". Þegar meirihluti fjárlaganefndar gerir ekkert í svona málum er ekki skritið að fjármál ríkisins fara alltaf umfram heimildir á hverju ári.

Stjórnskipunar- og eftirlitsnefnd

2. varaformaður nefndarinnar: Jón Þór Ólafsson

Nefndin fjallar um stjórnarskrármál, málefni forseta Íslands, Alþingis og stofnana þess, kosningamál, málefni Stjórnarráðsins í heild og önnur mál sem varða æðstu stjórn ríkisins. Nefndin fjallar um tilkynningar og skýrslur umboðsmanns Alþingis og Ríkisendurskoðunar. Nefndin hefur frumkvæði að því að kanna ákvarðanir einstakra ráðherra og verklag þeirra. Nefndin gerir tillögu um hvenær er rétt að skipa rannsóknarnefnd og gefur þinginu álit sitt um skýrslur þeirra.

Mál Pírata í nefndinni:

222. mál: [Þingsköp Alþingis \(líftími þingmála\)](#)

Málið kom til nefndar 28. febrúar. Umsagnarbeiðnir voru sendar 8. mars og barst ein umsögn. Ekki tókst að afgreiða málið úr nefnd.

132. mál: [Þingsköp Alþingis \(opnir nefndarfundir\)](#)

Málið kom til nefndar 20. febrúar. Umsagnarbeiðnir voru sendar 5. mars en engar umsagnir bárust. Ekki tókst að afgreiða málið úr nefnd.

89. mál: [Kosningar til Alþingis \(kosningaréttur\)](#)

Málið kom til nefndar 7. febrúar. Umsagnarbeiðnir voru sendar 22. febrúar og bárust 3 umsagnir. Ekki tókst að afgreiða málið úr nefnd.

19. mál: [Þingfararkaup alþingismanna og þingfararkostnaður \(leyfi frá opinberu starfi og starf með þingmennsku\)](#)

Málið kom til nefndar 1. febrúar. Umsagnarbeiðnir voru sendar 19. og 20. febrúar. Alls bárust 2 umsagnir. Ekki tókst að afgreiða málið úr nefnd.

Umhverfis- og samgöngunefnd

Áheyrnarfulltrúi Pírata: Björn Leví Gunnarsson

Nefndin fjallar um umhverfismál, skipulags- og byggingarmál og rannsóknir, ráðgjöf, verndun og sjálfbærni á sviði auðlindamála almennt. Enn fremur fjallar nefndin um samgöngumál, þ.m.t. framkvæmdaáætlanir, byggðamál svo og málefni sveitarstjórnarstigsins og verkaskiptingu þess og ríkisins.

Þingflokkur Pírata á ekki aðalfulltrúa í umhverfis- og samgöngunefnd, en samkvæmt úthlutunarreglum um sæti fastanefnda átti þingflokkur Pírata rétt á 7 sætum í fastanefndum Alþingis á kjörtímabilinu. Þingflokkurinn er þó með áheyrnarfulltrúa í nefndinni, Björn Leví Gunnarsson, sem hefur rétt til að sitja á fundum, taka til máls og styðja nefndarálit, þó að hann hafi ekki beinan atkvæðisrétt.

Utanríkismálanefnd

Nefndarmaður Pírata: Smári McCarthy

Nefndin fjallar um samskipti við erlend ríki og alþjóðastofnanir, varnar- og öryggismál, útflutningsverslun, málefni Evrópska efnahagssvæðisins og þróunarmál, svo og utanríkis- og alþjóðamál almennt. Samkvæmt 24. gr. þingskapa skal utanríkismálanefnd vera ríkisstjórninni til ráðuneytis um meiri háttar utanríkismál enda skal ríkisstjórnin ávallt bera undir hana slík mál, jafnt á þingtíma sem í þinghléum.

Mál Pírata í nefndinni:

17. mál: [Alþjóðasamningur um efnahagsleg, félagsleg og menningarleg réttindi](#)

Málið komst til nefndar 1. febrúar 2018. Kallað var eftir umsögnum um málið 12. mars, en tvær umsagnir bárust. Ekki tókst að afgreiða málið úr nefnd.

Velferðarnefnd

Formaður nefndarinnar: Halldóra Mogensen

Nefndin fjallar um sjúkra- og lífeyristryggingar, félagsþjónustu, málefni barna, málefni aldraðra og málefni fatlaðra, húsnæðismál, vinnumarkaðsmál og heilbrigðisþjónustu.

Störf nefndarinnar á 148. löggjafarþingi voru umfangsmikil og afgreiddi nefndin mikinn fjölda mikilvægra mála. Sum þeirra hefur þegar verið fjallað um, en þar má nefna rafretturfrumvarpið, sterafrumvarpið, innleiðingu NPA og ný lög um þjónustu við fatlað fólk og félagsþjónustu sveitarfélaga. Þá hóf nefndin að frumkvæði Halldóru Mogensen frumkvæðismál þar sem nefndin framkvæmdi rannsókn á barnaverndarmálum og tilnefningu Braga Guðbrandssonar í barnaréttarnefnd Sameinuðu þjóðanna.

Af framlögðum málum Pírata var eitt mál sem hlaut fulla afgreiðslu í velferðarnefnd og kom síðan til atkvæðagreiðslu í þingsal. Það var þingsályktunartillaga um skilyrðislausa grunnframfærslu (borgaralaun) en hún var lögð fram af Halldóru Mogensen og öðrum þingmönnum Pírata. Málinu var vísað til ríkisstjórnarinnar með þeim fyrirmælum um að ríkisstjórnin myndi tryggja að úttekt á kostum og göllum skilyrðislausrar grunnframfærslu yrði á meðal verkefna framtíðarnefndar. Þó að þær málalýktir tryggi ekki eins jákvæða niðurstöðu eins og óbreytt samþykkt málsins hefði verið er það ljóst að með þessu er könnun á skilyrðislausri grunnframfærslu orðin eitt af verkefnum framtíðarnefndar, og því áframhaldandi vinnsla tryggð. Þess má geta að Smári McCarthy, þingmaður Pírata verður formaður framtíðarnefndar.

Til nefndarinnar komu einnig fjölmörg önnur þingmannamál. Af þeim voru tvö frumvörp frá Halldóru Mogensen og þingflokki Pírata um breytingar á lögum um almannatryggingar og félagslega aðstoð, annars vegar varðandi varanlega festingu á frítekjumarki vegna atvinnutekna við útreikning tekjutryggingar og afnám á sérstakri uppbótar til framfærslu, en það frumvarp myndi hafa í sér afnám á krónu-á-móti-krónu skerðingum öryrkja. Frumvörpin voru samin af Bergþóri H. Þórðarssyni, félagsmanni Pírata og lögð fram af þingflokki. Voru þau þannig afar gott dæmi um afurðir af samstarfi grasrótar og þingflokks. Þá lagði Björn Leví Gunnarsson o.fl. fram frumvarp um 40 stunda vinnuviku sem var vísað til velferðarnefndar og barst nokkur fjöldi umsagna um það. Þá má að lokum nefna þingmál Halldóru Mogensen um notkun og ræktun lyfjahamps, sem var mælt fyrir og málinu vísað til velferðarnefndar. Öll ofangreind mál náðist ekki að afgreiða úr nefndinni. Hvað varðar önnur þingmannamál má einnig nefna frumvarp Silju Daggar Gunnarsdóttur o.fl. um brottmál líffæra (ætlað samþykki) sem varð að lögum eftir meðferð í velferðarnefnd. Þá var þingmál Samfylkingarinnar um breytingar á barnalögum varðandi stefnanda í faðernismáli einnig að lögum eftir meðferð í nefndinni.


Tölfræðileg samantekt á þingstarfinu

Tölfræði um þingmenn Pírata


Þingmenn	Ræður í þingsal	Heildar-ræðutími (Mín)	Fyrirspurnir + óundirbúnaðar fsp.	Þingsályktunartillögur	Frumvarp	Framsögu-maður í málum	Nefndar álit	Atkvæðagreiðslur	Dagar á þingi
Björn Leví Gunnarsson	383	1024	95+6	5	10	0	12	658	
Halldóra Mogensen	124	259	2+10	3	2	6	16	649	
Helgi Hrafn Gunnarsson	340	971	14+5	4	6	4	3	378	
Jón Þór Ólafsson	136	229	2+2	0	0	4	2	552	
Smári McCarthy	175	525	10+2	2	2	2	1	627	
Þórhildur Sunna Ævarsdóttir	123	252	1+6	1	6	8	1	607	
Vara - þingmenn									
Álfheiður Eymarsdóttir	41	19	3+0	0	1	0	0	38	22
Olga Margrét Cilia	14	12	5+0	0	0	0	0	85	34
Sara Elísa Þórðardóttir	45	21	1+1	0	0	0	1	329	16
Snæbjörn Brynjarsson	8	5	0	0	0	0	0	49	1

Fjöldi lagafrumvarpa, þingsályktunartillagna og skriflegra fyrirspurna á 148. þingi frá þingmönnum öðrum en ráðherrum

Þingflokkur	Stærð þingflokks	Lagafrumvörp	Þingsályktunar- tillögur	Skriflegar fyrirspurnir
Flokkur fólksins	4	3	3	47
Framsóknarflokkur	8	6	8	38
Miðflokkur	7	7	6	43
Píratar	6	26	11	119
Samfylking	7	7	8	30
Sjálfstæðisflokkur	16	7	6	33
Viðreisn	4	8	8	24
Vinstrihreyfingin	11	8	11	29



Fjöldi þingmála á hvern þingmann, skipt niður eftir þingflokkum



Meðalræðutími (í mínútum) á hvern þingmann, skipt eftir þingflokkum.

Fyrirspurnir til ríkisstjórnarinnar á 148. þingi

Meðalfjöldi virka daga v/ósvaraðra spurninga: **32**

Fjöldi ósvaraðra fyrirspurna: **123**

Meðalsvartími í virkum dögum: **32**

Fjöldi svaraðra fyrirspurna: **239**

Heildarfjöldi fyrirspurna: **362**, þar af voru fyrirspurnir Pírata **126**. Nokkrar fyrirspurnirnar voru til allra ráðherra og voru því eiginlegur fjöldi fyrirspurna Pírata **89**.

Þingmál Pírata

Þingmenn Pírata lögðu fram talsverðan fjölda þingmála á 148. löggjafarþingi. Þingmenn Pírata lögðu fram 26 lagafrumvörp, 11 þingsályktunartillögur, 3 skýrslubeiðnir og 127 fyrirspurnir á skjali til skriflegs og munnlegs svars. Hér eru talin öll þingmál sem þingmenn Pírata lögðu fram.

Frumvörp

Ársreikningar og hlutafélög: Opinn og ókeypis aðgangur að rafrænni uppflettingu í ársreikninga- og hluthafaskrá.

Þingfararkaup alþingismanna og þingfararkostnaður: Fjarlægja forréttindi opinberra starfsmanna að geta gengið aftur í fyrri eða sambærilegt starf eftir þingsetu.

Höfundalög: Undanþága frá höfundarétti til þess að tölva geti lært íslensku.

Almenn hegningarlög: Að stafrænt kynferðisofbeldi verði gert refsivert

Almannatryggingar: Varanleg lögfesting hækkun frítekjumarks örorkulífeyrisþega.

Almannatryggingar og félagsleg aðstoð: Afnám krónu á móti krónu skerðinga.

Kýrsetning, lögbann o.fl.: Frumvarp um að færa valdið til að setja lögbann á fjölmiðla úr höndum sýslumanna og til dómstóla. Frumvarpið var lagt fram í kjölfar lögbanns sem sett var á Stundina að beiðni Glitnis HoldCo.

Kosningar til Alþingis: Fjarlægja endurtekningu á því að “kæra sig inn á kjörskrá”.

Áfengislög: Lögleiðing á heimabruggi.

Þingsköp Alþingis: Líftími þingmála

Helgidagafriður: Breyta helgifyrirlögum í almenna frídaga, aðskilnaður ríkis og kirkju.

Stjórnartíðindi og Lögbirtingablað: Rafræn og opin útgáfa á Stjórnartíðindum og Lögbirtingarblaðinu.

40 stunda vinnuvika: Styttning dagvinnutíma niður í 35 klst. á viku.

Þingsköp Alþingis: Opnir nefndarfundir

Kristnisjóður o.fl.: Brottfall ákvæðis um ókeypis lóðir trúfélaga.

Hlutafélög: Arðgreiðslur til hluthafa fjármálafyrirtækja skyldu aðeins fara fram í uppgjörsmýnt viðkomandi félaga.

Meðferð einkamála: Að leggja þá skyldu á dómstóla um að rökstyðja það þegar þeir fella niður málskostnað. Markmið frumvarpsins var að leiðrétta réttarfarlegar takmarkanir á tjáningarfrelsi.

Meðferð einkamála: Að jafna möguleika þeirra sem sakfelldir eru í meiðyrðamálum til að áfrýja dómi til æðra dómstigs. Markmið frumvarpsins var að leiðrétta réttarfarlegar takmarkanir á tjáningarfrelsi.

Opinber fjármál: Fjölga fulltrúum í fjármálaráði úr 3 í 5.

Virðisaukaskattur: Tíðavörur og getnaðarvarnir

Fæðingar- og foreldraorlof: Andvana fæðingar.

Sveitarstjórnarlög: Íbúakosningar um einstök mál.

Opinber fjármál: Færa skiladagsetningu fjármálaáætlunar til 1. feb í stað 1. apr.

Kosningar til Alþingis: Persónukjör þvert á flokka.

Brottfall laga: Fella brott 208 lög sem eru orðin tóm.

Vátryggingastarfsemi: Fjármálaeftirlitinu gert það skylt að fylgjast með vátryggingarskilmálum, ekki bara “eftir því sem kostur er”.

Þingsályktunartillögur

Skilyrðislaus grunnframfærsla: Tillaga um að fela félags- og jafnréttismálaráðherra í samstarfi við fjármála- og efnahagsráðherra að skipa starfshóp sem kortleggi leiðir til að tryggja öllum borgurum landsins skilyrðislausa grunnframfærslu með það að markmiði að styrkja efnahagsleg og félagsleg réttindi fólks og stuðla að jöfnum tækifærum.

Rafræn fasteignaviðskipti og ástandsskýrslur fasteigna: Tillaga um að ráðherra setji upp rafrænt þinglýsingarferli, skjalavinnslu í kringum fasteignaviðskipti og rafræna viðhaldsdagbók fyrir íbúðir.

Alþjóðasamningur um efnahagsleg, félagsleg og menningarleg réttindi: Tillaga um að fela ríkisstjórninni fyrir Íslands hönd að undirrita og fullgilda valfrjálsa bókun við alþjóðasamning um efnahagsleg, félagsleg og menningarleg réttindi, sem var samþykkt á allsherjarþingi Sameinuðu þjóðanna 10. desember 2008.

Notkun og ræktun lyfjahamps: Tillaga um að fela heilbrigðisráðherra að undirbúa og leggja fram lagafrumvarp sem heimili notkun og framleiðslu lyfjahamps.

Bætt stjórnsýsla í umgengnismálum: Tillaga um að ráðherra leggji fram aðgerðir til þess að tryggja að foreldrar þurfi ekki að bíða eftir hinu opinbera í umgengnismálum.

Fjárfestingar í rannsóknum og þróun

Lágskattaríki: Þingsályktun um að vinna heildstæða löggjöf um lágs-kattaríki.

Aðgengi að stafrænum smiðjum: Tillaga um að stafrænum smiðjum (FabLab) verði komið upp nálægt öllum framhaldsskólum.

Kjötrækt: Tillaga um að staða kjötræktar verði könnuð og áhrif þeirrar tækni á framtíð landbúnaðar, sjávarútvegs og hagkerfi Íslands.

Undirritun og fullgilding þriðju valfrjálsu bókunarinnar við barnasáttmála Sameinuðu þjóðanna: Tryggir réttindi barna til þess að sækja rétt sinn.

Endurskoðun lögræðislaga

Skýrslubeiðnir

Ábendingar í rannsóknarskýrslum Alþingis: Samantekt á ábendingum í rannsóknarskýrslum Alþingis, við hverju hefur verið bruðist og hvernig.

Upplýsingaveita stjórnvalda við Alþingi: Skýrslubeiðni til Ríkisendurskoðanda um að framkvæma stjórnsýsluendurskoðun á upplýsingaveitu stjórnvalda, sérstaklega ráðuneyta, við Alþingi, í kjölfar umræðu um kostnað við fyrirspurnir.

Stjórnsýsla dómstólanna: Skýrslubeiðni til Ríkisendurskoðanda um að framkvæma stjórnsýsluendurskoðun á stjórnsýslu dómstólanna.

Fyrirspurnir

Samræmd próf

Atkvæðakassar

Siðareglur og upplýsingagjöf

Kjarasamningar framhaldsskólakennara

Aksturskostnaður alþingismanna

Húsnæðis-, dvalar- og ferðakostnaður alþingismanna
Valkvæð bókun IMO um hávaðamengun í skipum
Skilgreiningar á hugtökum
Launafl
Varnir gegn loftmengun frá skipum
Auknar fjárheimildir í frumvarpi til fjáráukalaga
Listamannalaun
Afgreiðsla umsókna um skattfrjálsa úttekt séreignarsparnaðar
Skipt búseta barna
Mengun af völdum plastnotkunar
Aðgengi að geðheilbrigðisþjónustu
Aðgerðaáætlun um orkuskipti
Hávaðamengun í hafi
Kaup á ráðgjafarþjónustu
Sjálfsvíg á geðdeildum og meðferðarstofnunum
Rekstur framhaldsskóla
Rekstur háskóla
Fíkniefnalagabrot á sakaskrá
Vímuefnaakstur
Tillögur starfshóps um vímuefnaneyslu
Fjöldi hjónavígslna
Húsnæði ríkisins í útleigu
Heilbrigðisþjónusta í fangelsum
Áætlanir um fjarleiðsögu um gervihnött
Ræðismenn Íslands
Formleg erindi frá heilbrigðisstofnunum
Túlkun siðareglna
Skriflegt svar við fyrirspurn þingmanns
Birting gagna
Ábendingar í rannsóknarskýrslum Alþingis og viðbrögð við þeim
Stuðningur við Fjölskyldumiðstöð Rauða krossins
Stuðningur við Samtök umgengnisforeldra
Úrskurðir sýslumanns í umgengnismálum
Styrkir til tölvuleikjagerðar
Nefndir og ráð um málefni fatlaðs fólks
Kostnaður við Landeyjahöfn og Vestmannaeyjaferju
Nöfn sveitarfélaga
Fæðingarstaður barns
Ráðherrabílar og bílstjórar
Ráðningar ráðherrabílstjóra
Hnjask á atkvæðakössum
Samræmd próf og innritun í framhaldsskóla
Notkun akstursbóka í bifreiðum Alþingis og greiðslur dagpeninga til forseta Alþingis
Rafmyntir
Afstaða Íslands til kjarnorkuvopna
Störf þingmanna á vegum framkvæmdarvaldsins

Ferðakostnaður og dagpeningar ráðherra og ráðuneytisstjóra
Landvarsla
Fftirlit með váttryggingaskilmálum
Ráðgjöf vegna siðareglna
Framkvæmd laga um almennar íbúðir og húsnæðissamvinnufélög
Atkvæðakassar
Fermingaraldur og trúfélagaskráningu
Óinnheimtar sektir í vararefsingarferli
Ársskýrslur Útlendingastofnunar
Undanþágur frá gjaldeyrishöftum
Kostnaður við hátíðarfund Alþingis
Húsnæði Alþingis
Nám á atvinnuleysisbótum
Börn sem sækja um alþjóðlega vernd
Fjölkorfameðferð við hegðunarvanda
Vinnutími, tekjur og framfærsla fanga
Hluti ríkisins í orku- og veitufyrirtækjum
Umhverfisvænar veiðar
Samræmd próf
Notkun stjórnvalda og ríkisstofnana á samfélagsmiðlum
Meðhöndlun ráðuneyta á ábendingum í nefndarálitum
Tillögur Lögmannafélags Íslands um gjafsóknarreglur
Ónýttur persónuafsláttur
Umsóknir um skattfrjálsa úttekt séreignarsparnaðar
Lánakjör
Landverðir utan friðlýstra svæða og þjóðgarða
Ný persónuverndarreglugerð ESB og afrit af þjóðskrá, kjörskrá og íbúaskrá
Gerðabækur kjörstjórna
Úrskurðir sýslumanns í umgengnismálum
Óskráðar reglur og hefðir
Sjúkraflutningar
Áverkar eftir hund
Fjárframlög sveitarfélaga til stjórnmalasamtaka
Úrskurðarnefnd um upplýsingamál
Biðlistar á Vog
Atkvæðagreiðsla utan kjörfundar
Veigamiklar ástæður
Kjararáð

Nánari upplýsingar um þingmál Pírata má finna á vef Alþingis:

[Þingsályktunartillögur og lagafrumvörp](#)

[Skriflegar fyrirspurnir og skýrslubeiðnir](#)